

Aruba den proceso di negociacion cu Colombia pa cumpra gas

Na termino medio of largo di tin interes lo por bin cu un gasoducto



NEL Oduber, Promer Minister cu recientemente tabata na Colombia, a duna di conoce cu e no a bai na e pais aki solamente pa acudi na e reunion di OEA, pero tambe a probecha e ocasion pa atende cu e problematica di energia.

E ta splica cu gobierno a laga traha un estudio y awor un compania renombra ta studiando esaki pa duna un di dos opinion, pa wak kico ta bai haci cu e problema energetico.

E estudio aki ta mira e diferente posibilidadnan pa cu energia al-

ternativo. Ta mira energia di bi-ento, energia solar como tambe deep sea, pero e ultimo aki no ta apto pa Aruba, pasobra nos no tin hopi profundidad. Tambe a studia pitch, pa en bes di usa fuel oil usa pitch, pet coke, pero tur dos ta sali 300 milyon dollar pa cambia e sistema, ademas pa haci esaki lo mester deshaci di loke nos tin na WEB awor.

Segun Oduber, WEB a hinca mucho placa den equiponan nobodi produccion di awa y e ultimo inversionnan ta den cuadro di usa menos energia.

Pero mirando e desaroyonan mundial, no tin otro alternativa y busca e forma di cambia esaki pa gas.

Colombia y Venezuela tin hopi gas, Colombia mas. Ademas segun Oduber, Colombia ta bezig ta trahando un gasoducto bou lama pa Puerto Rico. Colombia ta duna Venezuela gas gratis te 2012 y asina Venezuela keda cla, e lo debolbe Colombia e cantidad.

Ademas tin un conexon cu ta bai te Panama y pa diferente otro pais.

Promer Minister ta indica cu e mision di Aruba tabata, despues cu hendenan di WEB a bai Colombia y Venezuela, caminda cu nan a reuni na Colombia cu conseho regulatorio de energia y gas. Aki nan a bisa cu nan no por haci nada y cu mester deal

gobierno cu gobierno.

Di e forma aki via embahador di Reino na Colombia a solicita un reunion entre Promer Minister di Aruba y Presidente di Colombia cual a tuma lugar dia-domingo pasa. Tabata presente na esaki Minister di Relacionnan Exterior, vice minister di Relacionnan Exterior.

Meta di e conversacion tabata con Aruba y Colombia por coopera cu otro riba tereno aki. Premier a splica e Presidente di Colombia riba e estudionan cu a wordo haci. El a ofrece carbon for di Guajira, cu ta hopi serca di Aruba. Pero esaki no ta algo cu Aruba ta contempla debi na e inversion di 300 milyon dollar cu mester haci. E unico alternativa ta gas cual na Colombia ta wordo yama gas natural comprimido. Awendia mediante

batch por transporta e gas aki. President di Colombia tambe lo a ofrece Promer Minister si Aruba ta interesa lo por pone un conexon.

Esaki segun Oduber no ta un problema pa Colombia y di biaha President Uribe a yama Minister di Minas pa asina diabierna awor, embahador di Reino den nomber di Aruba reuni cune pa inicia e conversacionnan y despues nos mesun hendenan continua.

E situacion ta e siguiente: Aruba kier cumpra gas for di Colombia, Aruba lo mester por haci uso di e conexon cu tin na Venezuela, pero esey lo bin despues, promer mester bin cla cu Colombia y despues si Aruba ta interesa na termino medio of largo por bin cu un gasoducto.